

# **SAWA**



# **KEKKELBEK**

**4de Uitgawe – Augustus 2019**

# *INHOUDSOPGawe*

- ❖ *VIT DIE VOORSITTERSE PEN*
- ❖ *NOTAS VAN DIE SEKRETARESSE*
- ❖ *VAN DIE ONDERVOORSITTERSE PEN*
- ❖ *DIE PENNINGMEESTERES SE VERSLAG OOR ONS SKATKIS*
- ❖ *DIE JACK OF ALL TRADES (TEGNIES) SE DOENENLATE*
- ❖ *STORJE VAN DIE JEUGGOVER*
- ❖ *DIE REDAKTRISE SE KEKKELSTORJE*
- ❖ *SENIORS SE "SHORTCUTS"*
- ❖ *LIEF EN LEED*
- ❖ *FOTOS*
- ❖ *'NSUKSESVERHAAL WAT JOU SAL VERRAS*
- ❖ *FOTOS*
- ❖ *DIE PLAKKER OP JOU MOTOR*
- ❖ *FOTOS*
- ❖ *RESEP*
- ❖ *GOLFZILLA*
- ❖ *IN LIGTE LUIM*



## UIT DIE VOORSITTER SE PEN

**Francois Pretorius**

Hallo al ons SAWA lede,

Ons skop weer 'n nuwe jaar af op SAWA se bestuur. By die 39ste Algemene Jaarvergadering van Streek Vaalrivier wat op 3 Augustus 2019 by Koppisol gehou is, is van die vorige jaar se bestuurslede weer herverkies. Daar het ook nuwe gesigte bygekom, baie welkom aan hulle en baie dankie aan die lede wat hulself weer beskikbaar gestel het.

Ons hoop om meer van ons lede in die nuwe jaar by kampe te sien. Kom kyk wat ons alles aanvang en kom geniet 'n naweek saam met ons.

Ons begin beplan om fondse in te samel vir SAWA Vaalrivier se 40ste verjaardag wat volgende jaar gaan plaasvind. Ons beplan 'n groot makietie en wil graag al ons lede betrokke hê. Ons sal julle meer hieroor in verdere nuusbriewe vertel. Maar hou dit solank in gedagte.

SAWA-groete,

**Francois**





## NOTAS VAN DIE SEKRETARESSE

### **Joey Delpot**

Hallo Sawanante,

Dis so jammer dat julle nie almal by ons afgelope AJV-kamp te Koppisol kon wees nie. Dit was 'n heerlike kampnaweek en ons vertrou dat al die kampe wat tot die einde van die jaar geskeduleer is, ook so lekker gaan wees.

Ons volgende kamp vind plaas 30/8 tot 1/9 2019 te Kedu, Lindequesdrif. Die res van die kampe vir 2019 is soos volg:

Kongres: 06-08 September 2019

Nasionaal: 11-12 Oktober 2019

Geheime kamp: 25-27 Oktober 2019

Beach Club (Kersboom): 29 November – 01 Desember 2019

Groete tot volgende keer,

**Joey**





## UIT DIE ONDER- VOORSITTER SE PEN

### **Leon Delpot**

Met groot afwagting het die naweek van 2 Augustus 2019 aangebreek en het dit tyd geword vir die Algemene Jaarvergadering by Koppiesol.

Vrydag deur die dag en vroeë aand het die Sawanante hul woonwaens staan gemaak en lekker begin kuier om die vuur met heerlike groentesop, sjerrie en nat beskuit tot laatnag. Saterdagoggend het almal bymekaar gekom in die saal met warm koffie en beskuit. Daarna het die vergadering in alle erns begin.

Na die vergadering is die lede bederf met verversings, soos verskillende soorte muffins en koffie. Danksy Eugene Ferreira het daar die middag 'n honger Golfzilla ontwaak wat almal toe probeer voer het. Eugene het die voorbeeld gestel van hoe dit gedoen moet word alhoewel dit niks gehelp het vir die manne nie. Almal het probeer maar sommiges, soos Carine, het "getry cheat" deur hom met die hand te voer maar dit het nie getel nie.

Saterdagaand was daar groot "geparty" en gedans op die lekker musiek wat deur ons eie DJ, Jacques van Zyl, opgedis is. Slaiae, brode, vleis en pret was volop en almal het hulle gate uit geniet. Daar is baie gelag en grappe gemaak. Kyk maar na die fotos wat elders in die nuusbrief verskyn. Baie geluk ook aan Henry Hartslef wat die wenner was van die braaikompetisie.

Sondagoggend het almal in die saal byeengekom. Casper Muller het weer eens een van sy uitsonderlike preke aan ons gelewer.

Na kerk is daar verder gesmul aan die poeding en muffins wat oorgebly het van Saterdag. Daarna het die Sawanante maar so drupsgewys opgepak en huiswaarts gekeer na 'n baie lekker saamkuier naweek.

Ek wil net aan elkeen wat deel was van die suksesverhaal baie dankie sê vir alles, in besonder aan Dot en Joey. Hulle was ons meesterkokke wat baie eetgoedjies gereël en voorberei het. Baie dankie ook aan Jacques vir al sy moeite met die musiek. Baie dankie ook aan al die ander wat by die reëlings betrokke was, dit word waardeer.

Ek glo en vertrou ons gaan n baie positiewebeeld opbou en SAWA Vaalrivier weer na nuwe hoogtes lei. Ons moet die positiwiteit wat tussen ons is, uitbeeld en ons lede weer positief motiveer dat hulle begin uitsien om weer te kom kamp. Ons hoop ons kan voortbou op die sukses van die afgelope AJV kamp.

Groete tot ons volgende kamp,

**LEON**





# DIE PENNINGMEESTERES SE VERSLAG OOR ONS



**Elize van der Schyff**

SAWA-vriende,

Tydens die pas afgelope Algemene Jaarvergadering is daar besluit dat die kollekte wat by elke kampnaweek se kerkbyeenkoms ingesamel word, soos volg aangewend sal word:

Kollekte ingesamel gedurende die 2018/19 finansiële jaar word aan **Jessica's Wall of Life** in Vanderbijlpark geskenk.

Kollekte wat ingesamel gaan word in die 2019/20 finansiële jaar sal aangewend word om die **Dierebeskermingsvereniging, Vereeniging en Vanderbijlpark**, te ondersteun. Hulle sal aan die einde van die finansiële jaar genader word om vas te stel watter tipe hulp die dringendste benodig word, bv. Komberse of herstelwerk aan hokke, hondekos, ens.

Tot volgende keer, SAWA-groete

**ELIZE VAN DER SCHYFF**





## DIE JACK OF ALL TRADES (TEGNIES) SE DOEN EN LATE

**Garath Ferreira**

Goeiedag Sawanante,

By die afgelope AJV-kamp te Koppisol het die volgende lede toekeningsplaasjies ontvang:

Beverly en Eugene Ferreira:	15e Kampkommandant
Garath Ferreira:	10e Kampkommandant
Jacques en Lizelle van Zyl:	50 Algemene Saamtrekke
Kobus en Eileen Bezuidenhout:	10 Streek Saamtrekke

Groete tot volgende keer,

**GARATH**





## STORIE VAN DIE JEUGOUER

**Jacques van Zyl**

Aan al die SAWA-maats, hier is vir julle 'n storie. Die storie is gepas vir enige ouderdom, van 1 tot 100, geen ouderdomsbeperking. Lekker lees.

"My vrouetjies! My vrouetjies! Ek bou vir julle huisies, huisies" sit en sing Gelie Geelvink, die Kaapse wewer, so hard as hy kan. Hy is vrolik en fluks en rus nou net so 'n bietjie. Sy buurman sit op 'n ander tak langsaan. Hy is net so opgewonde en plesierig. Hy sit ook net so lekker en sing en kwetter en raas. Is hy dan nie net so hard besig soos ou Gelie om hierdie geelvinkdorpie groter te bou nie? Die dorpie is hoog in die boom en die huisies swaai vrolik aan die takke se punte bo-oor die rivier. Jammer dis droogte en die water is maar vlak.

Golie Geelvink spring weer aan die werk. Twee huisies is al kant en klaar. Nou begin hy met sy derde. Hierdie soort vinke maak mos maar so. Elke man het 'n hele paar vrouetjies en vir elke vrou bou hy 'n huis. Ja, geelvinke is van die beste bouers van voëlneste in die hele wêreld. Hulle is wonderlike wewers. Stewig en vinnig draai hierdie kerel nou grassies om die plekkie aan die tak waar die huisie moet hang. Dan maak hy 'n grashoepel en woel dit deeglik daaraan vas. Aan weerskante van hierdie hoepel begin hy die nes bolvormig uitbou. Aarde, maar kan so 'n voëlmannetjie tog nie goed en vinnig weef nie! Skaars 'n dag gewerk en die stewige bol is kant en klaar. Van binne is dit hol. Die ingang van die huisie is skuins aan die onderkant en wys grond toe. Maar al is dit so, sal die eiertjies en later die kleintjies tog nooit uitval nie. Daarvoor het Gelie gesorg. Aan die binnekant is 'n oulike soort drumpel wat keer. Weer rus Gelie Geelvink so 'n bietjie. Maar hierdie keer hang hy nog net so kop onderstebo soos toe hy aan die werk was. Vir hom maak dit nie saak op watter manier hy werk of rus nie. Hy is altyd vrolik.

Hy sing en raas en kwetter en klap en laat sy vlerke bewe – tog alte plesierig. “Hallo buurman” fluit Gelie vir ‘n maat. “Hoe ver is jy al?” “Ek bou sommer lekker vinnig”, sing die buurman terug. “Ek het al ‘n hele paar huisies klaar – vir elke vrou ‘n huis. Nou kan my vrouwtjies elkeen maar self haar huisie kom uitvoer.” Die fyn grassies en vere maak die nessie tog te lekker sag en warm van binne – net reg vir die eiertjies.

Gelie Geelvink spring weer aan die werk. Sy vrouwtjies voer natuurik ook self hul nessies uit met grassies en veertjies. Nou het Gelie die huisies vir al sy vrouwtjies klaar. Maar waarom sal hy nie maar nog een of twee bou nie? Die dorpie moet tog groei en groter word.

“Ha, ha ...” lag Apie opgewonde. Hy en ‘n maat het nou net op hierdie geelvinkdorpie aangekom. Hulle dink daar is al eiertjies in die nessies. “Kom ons eet ons gou trommeldik aan die voëleiers” sê hy. Haastig klouter Agie Aap teen die boomstam uit. Jammer die nessies hang almal so ver vorentoe aan die takke se punte. Maar hy is te haastig en baie lus vir die eiers. Hy sal darem maar probeer. Agie Aap rek hom uit. Hy kan net nie bykom nie en rek nog ‘n bietjie verder om die nessie raak te vat. Kirr ... aak ...! Kra ... aaak!” Die dun takkie knak en daar val Agie Aap binne-in die water! “Sjoe, maar die water is koud en nat!” kla die aapkêrel en sukkel uit die modder na die droë grond toe. “So sal dit gaan as ape nie hul hande tuishou nie” sit en lag Gelie Geelvink. Druipstert draf die twee apies nou maar huis toe. “Julle kan bly wees die rivier was nie vol nie” fluit Gelie hulle agterna.

Agie Aap hoor die geelvink nie meer nie. Maar ou Gelie hou nog maar aan met sing en kwetter. En saam met hom fluit en raas die hele dorpie se vinke.

***Ek hoop julle het die storie geniet. Laat weet as julle nog stories wil lees.***





## DIE REDAKTRISE SE KEKKEL HOEKIE

**Louise van Zyl**

SAWA-vriende,

‘n Paar nuwe besems is in SAWA Vaalrivier ingebring, ek is een van hulle. Baie van julle onthou seker die liedjie wat ons by skoolsportbyeenkomste gesing het: Die besem, die besem, wat maak daarmee, wat maak daarmee, ons vee daarmee, ons vee daarmee, ens. So hoe ons hier gaan vee, sal die tyd leer.

Ons gaan probeer om die Kekkelbek bietjie te verander, ons hoop dat julle daarvan sal hou. Indien enigeen verhaaltjies, versies, resepte, wenke of wat ook al het wat ons in die nuusbrief kan invoeg om dit so met mekaar te kan deel, kan julle dit vir my stuur. My e-pos adres is [kekkelbek.vaalrivier@gmail.com](mailto:kekkelbek.vaalrivier@gmail.com).

Ek hoop dat almal hierdie uitgawe van ons Kekkelbek sal geniet .

*En onthou, as dinge jou dryft tot kookpunt,  
maak koffie.*



# **SENIORS SE “SHORTCUTS”**

**Die kinders het mos hul SMS kodes – soos BFF, WTF, LOL, ens. So, hier is kodes vir seniors:**

BDD –	By die dokter
BVSB –	By vriend se begrafnis
BDR –	Bring die rystoel
KWS –	Kry weer sooibrand
SG –	Skryf groter
MWG –	Maag werk goed
IMGA –	Is my gehoorstoestel aangeskakel?
MGPBL –	Moet gaan, pasaangeër se battery laag
MGPBW –	Moet gaan, purgasie begin werk
WPEA –	Wat praat ek alles?
WWW –	Waar was ek nou weer?



# LIEF EN LEED

## LIEF

Baie geluk aan die volgende persone wat verjaar het of gaan verjaar:

### Augustus

Beverley Ferreira      13 Augustus

Susan Connaway      18 Augustus

Kosie van Arkel      19 Augustus

### September

Michelle Terry      7 September

Eugene Botha      9 September

Johan van der Schyff      23 September

Elize van der Schyff      28 September

Barbara Kamffer      29 September

Francois Pretorius      29 September



## LEED

Pietra Otto is op 2 Augustus oorlede.

Ons wil graag vir enige van ons lede wat 'n geliefde verloor het of siek is, so ook enige van ons lede wat self ongesteld is, enige tipe van behandeling ontvang of besig is om te herstel, sterkte en vinnige beterskap toewens.





*Carine leer Johan flos !!??*



*Anton was baie honger en dors na 'n laaang dag. Shame, Johan het net 'n broodjie – dis darem beter as niks*



*Joey en Dot het gesorg vir die lekkernye. Baie dankie julle!!*



*Die manne het Golfzilla omtrent geniet*

# **'n SUKSESVERHAAL WAT JOU SAL VERRAS**

Op 9 September 1890 is Harland Sanders op die plattelandse dorpie Henryville in Indiana in die Midde-Weste van Amerika, gebore. Harland was maar ses jaar oud toe sy pa oorlede is. Op hierdie vroeë ouderdom was hy die oudste van drie kinders en moes hy elke dag na sy jonger boetie en sussie omsien toe sy ma moes terugkeer na haar werk ten einde vir haar kinders te kan sorg.

Teen die ouderdom van sewe het Harland dus al geleer kook sodat hy kon toesien dat sy boetie en sussie kos kry wanneer sy ma by die werk is. Dit was maar net een van sy vroeë suksesse. Harland was in Graad 6 toe hy die skool verlaat het en het verskeie soorte werk deur sy tienerjare en as jong volwassene gedoen. Daar was geen werk wat hy nie bereid was om te probeer doen nie, van plaashulp tot omsien na die leer se muile. Hy het selfs in 'n stadium 'n motel bedryf, motorbande verkoop en 'n vulstasie beman.

Teen veertigjare ouderdom het Harland 'n diensstasie in Corbin, Kentucky, bestuur. Hy het van die geleentheid gebruik gemaak om sy tuisaangeleerde kookvernuf ten toon te stel en heerlike kos aan honger reisigers te verkoop. Harland se vinnigste, maklikste resep het gesorg vir 'n spesialiteitsdis soos min. Sommer gou het almal dwarsdeur die staat Kentucky oor Harland se heerlike kos gepraat. Reisigers van oraloor het hul reisroete so beplan dat hulle by Harland se diensstasie kon aandoen om sy watertandkos te geniet.

Uiteindelik was Harland genoop om sy besigheid van die diensstasie af na 'n groter perseel te skuif en het hy 'n restaurant net oorkant die straat begin. Vir jare daarna het hy sy kookkunstegnieke in daardie restaurant se kombuis geslyp en sy eie uit-sonderlike en geheime speserymengsel ontwikkel. Sy besigheid was 'n reusesukses en het floreer op die gewildheid van sy vinger-lek-lekker diepgebraaide hoender. Na alles waardeur hy is met die verloop wat sy lewe geneem het, het sy toekoms blink geskitter. Op sestigjarige ouderdom is Harland egter geforseer om sy restaurant te sluit toe die staat besluit het om 'n hoofweg te bou oor die grond waarop sy restaurant gestaan het. Dit het gelyk asof sy droom tot 'n einde gekom het. Harland was te oud om oor te begin.

Wat het hom te doen gestaan? Wat was die alternatief? Hoe gemaak van hierdie punt af? Hy was te oud. Dit was te laat.

Maar Harland het geweier om diep bedruk op 'n hopie te gaan sit en homself jammer te kry. Daarenteen het hy gekies om iets te DOEN. Baie mense sou in dieselfde situasie hul eerste maandelikse pensioenuitbetaling, of in Harland se geval sy Amerikaanse bestaansorgbetaling, as die begin van die einde gesien het. Maar nie Harland nie. Hy het dit as 'n teken en 'n geleentheid gesien om met iets nuuts te begin. Hy het sy eerste uitbetaling van \$105 geneem en dit gebruik om 'n besigheid te begin wat die eksklusieve regte op sy spesialiteitsdis, diepgebraaide hoender, aan belangstellende restaurante verkoop het. Hy het dwarsoor die land gereis en sy uitsonderlike hoender in die kombuis van elke restaurant wat daarin belanggestel het, berei. Hy het met die restaurante onderhandel dat hulle ooreengekom het om hom 5c te betaal vir elke hoender wat hulle volgens sy resep en met sy unieke kruie- en speserymengsel berei het.

In 1964 het Harland meer as 600 takke regoor die land gehad wat sy spesiale hoender op sy spesiale manier gemaak het en hy het besluit om sy belang in die besigheid vir \$2 miljoen aan 'n groep beleggers te verkoop. Twee jaar later is die onderneming op die New Yorkse aandelebeurs genoteer. Harland het nou betrokke gebly by die besigheid wat hy begin het en vir die res van sy lewe aangehou om elke jaar sowat 400 000km te reis na restaurante oraloor die land. Hy het wêreldwyd bekend geword vir sy heerlike hoender - maar niemand het hom meer Harland genoem nie. In stede daarvan het almal hom die 'kolonel' begin noem – kolonel Sanders, die gesig agter die gewilde hoendergeregt wat nou as Kentucky Fried Chicken bekend staan. En die kolonel het een baie belangrike feit in die lewe baie goed verstaan: **Dit is nooit te laat om oor te begin nie.**





**So het die naweek Vrydagaand begin**



**En so was dit Saterdagaand - Cheers op SAWA en 'n heerlike naweek !!!**



*Ons het 'n disco van formaat gehad, dankie Jacques!!*



**Waar's dit lekker, hier's dit lekker !!!**

## **DIE PLAKKER OP JOU MOTOR**

'n Baie wetsgehoorsame man was besig om huis toe te keer en die verkeer was baie druk. Toe hy na die volgende verkeerslig aangery kom, het die lig oorgeslaan na geel en omdat hy sy kind in die voertuig gehad het, het hy besluit om te stop eerder as om oor te jaag.


Die dame in die voertuig agter hom het dit egter totaal en al verloor. Sy was baie haastig en hierdie man gaan stop sowaar by 'n geel lig!! Sy het haar venster oopgedraai en op hom geskree. Sy het "vingertaal" met hom gepraat en toe lê sy op haar motor se toeter om haar ontevredenheid te verkondig.

Die volgende oomblik het 'n polisieman by die dame se oop venster kom staan en haar gevra om uit die voertuig te klim. Hy het haar bestuurslisensie nagegaan en haar toe geboei en saamgeneem aanlagkantoor toe. Sy was daar opgesluit in die aanholdingselle.

Na 'n paar uur het dieselfde polisieman haar uit die aanholdingselle kom haal en haar persoonlike besittings aan haar terugbesorg. Hy het haar om verskoning gevra vir die ongerief en aan haar gesê dat hy agter haar motor was en gesien het hoe sy skel en "vingertaal" praat en toe nog op die toeter lê. Hy het toe na haar voertuig gekyk en 'n plakker gesien wat sê: 'WAT SOU JESUS DOEN' en net langs dit nog n plakker wat sê: 'EK IS OP PAD HEMEL TOE, VOLG MY AS JY WIL SAAMGAAN'. Hy het toe gedink 'dan moet hierdie beslis 'n gesteelde motor wees want die eienaar is duidelik 'n Christen en die bestuurder is beslis nie een nie'.

Hoe lees die wereld jou plakker? Sê dit jy is 'n Christen of sê dit 'hulle sê hulle is Christene'. Daar is 'n groot verskil.

*(Baie dankie aan Casper Muller wat hierdie verhaal met ons gedeel het.)*





**Garath ontvang 10e Kampkommandant toekenning**



**Jacques ontvang 50 Algemene Saamtrekke toekenning**



**Kobus en Eileen ontvang 10e Streek toekenning**



**Eugene en Beverley ontvang 15e Kampkommandant toekenning**

# RESEP: KARRINGMELK PLAATKOEKIES

(Resep lewer 1 dosyn plaatkoekies)

## Bestanddele

2 groot eiers  
5 eetlepels strooisuiker  
1 teelepel vanieljegeursel  
3 eetlepels botter, gesmelt  
1 koppie karringmelk (250ml)  
1 koppie bruismeel  
1 teelepel bakpoeier  
1 knippie sout

## Metode

Klits die eiers en suiker saam tot die suiker opgelos is. Voeg vanieljegeursel en gesmelte botter by en meng goed. Meng die droë bestanddele en voeg by eiers en suikermengsel. Voeg die karringmelk by en klits goed.

Bak lepelsvol van die mengsel oor matige hitte in 'n gesmeerde, kleefvrye pan. Sodra borreltjies op die oppervlak van die plaatkoekie vorm, draai die koekie om en bak die anderkant ook tot goudbruin. Bedien met botter en stroop of vars bessies en room.

Jy kan die deeg voor die tyd aanmaak en laat staan. Dit bak makliker en mooier as dit 'n ruk gestaan het.

Maak maar die bestanddele dubbel aan, dit is baie lekker en jy gaan dubbel soveel eet as gewoonlik.



# Golf-Zilla!

**COME FEED  
THE BEAST!**

**6 Meter tall inflatable  
Dinosour “Golf target.”**

**Great fun for the  
whole family !!!**

*the only one of  
its kind in SA!*

**Available for hire  
Contact: 082 782 5736**



## IN LIGTE LUIM

Gatiep sit op couch en kyk n video.....

Skielik skree hy vi die ou ini video:

"MOENIEINI KERK GAN  
NIE.....MOENIE IN GAN  
NIE.....ooooh DJY GAN SPYT  
WIES NE!!!"

Sy vrou vra hom:Gatiep....wat kyk d'jy?

Hy antwoord...."Ons trou video...!!



Kekkel lekker tot volgende keer !!!!

# NOU GAAN ONS



BEURT Krag ....  
Nuwe Fases ....  
**FASE 1:** steek aan die  
vuur  
**FASE 2:** gooi 'n dop  
**FASE 3:** braai 'n chop



